

草溪卞氏派譜序

草木之盛而必有其根江河之大而必有其源物猶然况人乎祖宗比則根源也子孫比則枝流也推而上之萬殊而一本也推而下之一本而萬殊也不有譜焉曷以明其所以哉惟我卞氏以高麗侍中文烈公爲始祖文烈公卽唐朝禮部尙書諱源之裔也尙書以天寶八學士之一奉命而東以教新羅詩禮其深功厚澤有如是矣天之所以篤生我文烈者其以是歟自文烈以後賢德相承亦有文章忠義遂成海外一清族而子孫本支寔繁以昌則可謂源遠而流長根厚而枝繁矣其修譜也始於 仁祖甲寅次於前後壬戌次於甲子次於戊戌而最後者 隆熙記元後戊辰之譜也噫今距戊辰已三十年所矣生齒日繁類多譜外之人則譜又不可以不修也於是宗論齊發于昌原之道山堂以叅判公派譜爲定者比諸大派簡精而易成易成而又便於尋攷也旣成以余爲年邵行高置一言于卷端余方耄昏矣何敢

當之亦何敢辭諸乃作而言曰天地之性人爲貴其所以爲貴者以其有孝悌親睦之道也夫欲其明是道必先自譜系而始焉故程子曰管攝人心張子曰忠義立焉然則譜於人道顧不重歟凡爲吾宗而觀吾譜者知其所自生而推萬殊之一本又知其所由分而推一本之萬殊則必有其油然而生者矣可不勉哉

丁酉十月上浣後孫千洙謹序

甲寅譜序

吾仲父承宣公嘗謂余曰吾先世舊譜失之於兵燹之餘其後宗黨零替尙未克纂次而余嘗盡然於斯先祖之配耦姓貫世繼及諸宗之分派衰盛偏求於連門之諸譜又叅以平日所聞於父兄者僅作此譜若其見聞之未詳者姑爲闕疑以竣後日其代余而續成者惟在於汝乎余謹誌于懷凡諸家之譜牒廣披繙閱積有年紀然後始知先代外姓之鄉貫官爵及旁親支孫之名號世代或未免有舛誤者就仲父所修之譜而追改刪定至若吾宗之直派則爵位享年墓山并爲詳錄以示親疎之有別噫余之受仲父命于今二十餘年始克裒集而爲譜未知繼此而復修者其果誰歟日後子姓之覽是序者亦必有所感云爾

崇禎紀元後甲寅仲秋上澣侍中公十六代孫梃謹叙

壬戌譜序

昔歐陽永叔叙其繼上自得姓之初蘇明允譜其族盡收六州之世籍君子美其文獻之有餘而此大夏之所稀有以此偏方而其系譜之遠且廣得如今草溪卞氏者亦無愧於名家之文獻矣己自勝國時多稱卞氏之有文章行業而入我朝彬彬可述者又提學公爲最而兄弟數人並有名當世則於是乎系譜之詳且盛不止如今日而踈失於兵燹之歎誠有如承宣公語其從子叅議公而咨嗟也叅議公所修本與諸家譜牒或有詳畧之異而傳實明熹又無如是譜也惟刊出而行于世至于今日而始成則固王事多勞未暇及私而亦豈非事有其時時有早晚者歟宗周之禮樂文爲定於成康而其基實自古公西伯而始則事固有類此也亦可見後昆之不替而有以守張子之訓矣噫同其祖而不同其譜者則無乃不講於不知族之譏耶同其譜而不同其本者則恐違朱夫子必稱新安之義也人各有見不與我同則我固任之而惟講於斯者體先祖躬行孝友之德實勉睦婣之行誦公藝

一字之忍致董生鷄犬之祥則將見處家而有孝子慈孫之名立 朝有而
貞臣良弼之傳世德有光譜牒輝赫不徒如歐蘇文獻而止矣刊役也終始
誠勤者侍中公十八代孫復夏十九代孫至明至鼎也以余爲卞氏之彌甥
也命之序其事余不敢辭謹撮其槩而言之時

崇禎後再壬戌秋侍中公十九代外孫德殷宋可相序

壬戌譜序

昔程夫子嘗以明譜系三字爲管攝天下人心之道則叙系譜族之義顧不
重且大歟惟我草溪之卞固國內清族也已自得姓之初冠冕世襲文學輩
出苟非我祖宗深仁厚澤惡能如是嗟乎我判尹公之隱德立節提學公之
盡心忠孝足爲激頹俗裕後昆而以至一室之內六七弟兄名顯當世位至
宰輔則譜系詳且盛不止如今日而兵燹之餘文獻失傳吾宗之不幸久矣
何幸我叅議公盡然傷嘆始成草譜而繼又我生王考竭誠哀集刊行壬譜

使各處諸宗明知先代世系事實則敬宗收族之道於是乎至矣盡矣然而壬譜刊行已過一周甲周甲之間後生子孫俱未入錄安知後昆之幾何其不相路人視也不肖等有志繼述忘其僭越廣詢諸宗踵成此譜而去故已遠遺風寢衰甚至於忘本背先私出僞譜者有之則如彼密陽云者何足道哉惟譜於斯者咸各體先祖孝友之德益勉睦婣之行以致孝子慈孫之傳世則不但爲世德譜牒之有光也亦不違程夫子明譜系之訓也云爾

崇禎紀元後三癸亥秋不肖後孫五鎮謹序

甲子譜序

卞氏之舊譜已在百餘年前其間世數寢遠子孫益蕃則有不足以備文獻之証迺於乙丑之歲合謀重刊其親疎隆殺之例悉倣舊譜而視加詳矣功告訖問序於余余曰譜旣次其昭穆及其生沒官爵葬埋所在統緒離合又畧記其事行序固在其中而又有舊序諸作備矣今何庸贅爲雖然古人於

弁首之文多寓勸戒之意無已則余其有一說乎昔蘇老泉之序譜以爲推
以至於一人之身則孝悌之心油然而生張橫渠之訓則以爲各知來處忠
義立焉譜之所以有關風俗者如是矣卞氏之系出自高麗侍中公其後昆
散在各道文譜武籍蟬聯相繼皆多有文人名士或以文行見詔師門或以
孝友名登剡牘爲今日同此譜者苟能遵守先懿母或墜失則其將人皆有
孝悌之心而其必大有益於朝廷也明矣余所居西原縣有飛鴻里卞氏一
派世居於此與爲土著氏族之一焉蓋其先世多出入於吾先子門下文學
操行久爲鄉人艷稱爲其子孫者尤各勉之於是乎書

崇禎紀元後四乙丑孟秋 日德恩宋近洙序

己亥譜序

人道莫大於親親而親親始於父子殺于澤斬然殺之不已至於塗人則非
所以管攝人心之道也故聖人立宗法辨氏系名昭穆使之反本收族不失

其親愛之心六行之首曰孝曰友曰睦所施雖不同而其爲親々之義一也則譜族叙系之道顧不重且大歟惟我始祖侍中公卽中華禮部尙書諱源之裔也尙書公之實蹟昭著於八學士遺傳侍中公之封諡特載於八溪舊輿誌而舊譜只錄官啣不係封諡無乃經燹失籍而然歟尤不勝千載之憾也於是乎上自祖宗下及支裔其文譜武籍嘉言善行爲範俗表世者無不節取以錄亦不違聖人明昭穆之訓也歟昔眉山之譜上不過高祖下以逮總親而曰觀吾譜者孝悌之心油然而生況吾譜遠自一人之身以至路人之踈而無不畢書則其油然而敬愛之心廣且大可知且有家乘之可以觀德則百行之外詩禮事功并足以垂裕後昆者必如鞞鑪之錘矣豈不盛哉凡我同譜之人自先祖視之皆一體氣脉也率仁而上之則祖先雖遠卽父母也率義而下之則族屬雖踈卽兄弟也皆能追念一體之分親愛之心油然而生則遠者未始不近踈者未嘗不密而祖先之心豈不安樂於冥冥之中

乎人情大抵施之不報則輟故恩不能終繼自今互相戒勅惟以順祖爲心各盡其道不要相學其不好處則親々之恩百世如一日可以不愧是譜亦可以不負吾姓矣蓋以是勉旃

上之三十六年己亥孟秋後孫榮五謹序

戊辰譜序

夫譜者一家史也其義不亦重且大歟蓋自上祖支分而派別以至于百千萬人人各以親々之義溯其流而達其源則皆自一人而分矣然世代愈遠則或不免於路人此譜所以不得不修也記其志行述其事業以爲承述之地則人皆生孝悌之心而遠者近踈者親古人所謂百代之親者也卞氏之譜凡四經刊矣昨年戊辰又謀重刊定祚相澈甫以一門僉議跋涉數百里請序于余々以崦嵫殘景何敢當是託也就按其舊譜弁文則揄揚勸戒之意已無餘蘊於大方筆下矣余何庸贅焉若其文獻之表著者則忠孝之士

學問之儒代不乏人而皆載在于舊譜矣爲其裔孫者當各自勉勿墜先懿
豈非承述之第一義也至如修譜顛末亦有可記者承宣公諱時益叅議公
諱梃創始於甲寅而諱復夏繼修於壬戌諱洪鎮又脩於其後之壬戌諱泰
來修於甲子諱榮五修於己亥者纂訂皆有法可以徵諸後矣是役也則靜
菴公後裔晚成公炯圭經記者有年而不幸棄世其嗣子鍾來鍾鳴尤致其
力云可謂善繼而善述矣兼爲卞氏一門賀也

己巳三月 日通政大夫前行弘文館應教知製教兼經筵侍講官

春秋官編修官河東鄭承鉉序

跋

我卞氏之譜修凡有六而始於甲寅後於戊辰自戊辰至于今年又爲一世矣地有沿革而居住異同人有牛歿而代次變禪則譜不可以不急修也宗論由是一發而嶺湖相應罔有不悅其亦時歟大譜乎則不但有同祖異貫之派亦恐卷帙浩大卒難以成遂則叅判公爲派祖而明其歲次嚴其宗支細疑存信舉昵及踈譜凡四冊噫斯譜之作豈徒然乎哉上而尊祖則孝誠之心油然而生矣下而收族則親睦之德自然而厚矣爲吾叅判公後仍者當各思其所生而務其實心實德則是將一身之化及於一族一族之化及於一國而庶今日修譜之意也盍相與勗哉譜旣訖命余置一言于卷尾不揆僭猥謹叙大槩如右云爾

丁酉十月下浣 叅判公十九代孫鐘燮謹識

草溪卞氏派譜卷之一

諱源

唐天寶中為禮部尚書癸未帝在蜀新羅景德王遣使浙江而至成都朝正月帝嘉之命學士八人賜孝經一秩徃教新羅公與中郎將魯忠國翰林盧塢大將軍閔叔尚書令洪悅中郎將董燁河南太守李燮大司徒呂元奉命渡海而東倡興詩禮

二世

子蕃

入仕唐朝不返

子著

女真騎都尉

三世

子繼祖

宣德王朝為大司徒唐建中四年癸亥公請立社稷壇又請立養賢閣召募學徒教誨不倦王稱歎其能繼祖道特賜名繼祖昭聖王朝為平章事

四世

子喆

憲德王朝為侍中郎興德王朝為平儀大承

五世

子鏞

文聖王朝為大司徒正憲安王朝為大部令千牛頭犬角千

六世

子怡

下見

草溪卞氏派譜卷之一